

Buka taska penawar sunyi

Klang: Pengalaman mengasuh kanak-kanak membantu wanita ini membuat keputusan membuka taman asuhan kanak-kanak (taska) selepas kematian mengejut suaminya akibat serangan jantung beberapa tahun lalu.

Ternyata percaturan itu membantu Zarina Abdul Rahman, 40-an meneruskan kehidupan dan menyara anak tunggalnya, Mohd Zikri Mohd Zaid, 15, tanpa mengharapkan bantuan pihak lain.

Menurut Zarina, sebelum itu perbelanjaan rumah serta anak tunggal ditanggung suami selain dibantu pendapatan sampingannya sebagai pengasuh.

"Hubungan akak dan suami sangat erat. Kehilangan arwah secara tiba-tiba memberi kesan kepada akak

dan anak. Tipulah kalau kata tidak sedih tetapi demi anak kena kuat. Dia anak tunggal, dia tentu begitu rasa kehilangan bapa kerana rapat dengan arwah.

"Malah kalau terus bersehid, siapa pula hendak menyara keluarga. Anak perlukan duit perbelanjaan sekolah dan bil rumah perlu dibayar," katanya.

Beliau bernasib baik apabila mempunyai kenalan yang membantu memberi tunjuk ajar serta sokongan diperlukan.

"Sebenarnya kenalan banyak membantu akak. Akak anak yatim dan menumpang kasih dengan rakan yang sering mendengar keluhan. Mereka banyak memberi nasihat agar memulakan perniagaan taska kerana sudah biasa menjaga anak orang

"Rakan daftarkan akak untuk mengikuti Kursus Asuhan Kanak-kanak di Universiti Putra Malaysia (UPM) setahun selepas kematian suami agar dengan sijil berkenaan boleh memperkembangkan perusahaannya taska.

"Alhamdulillah dengan menawarkan perkhidmatan taska, akak menjana pendapatan untuk keluarga. Selain itu, apabila menguruskan perniagaan taska juga membuatkan akak boleh lupa seketika rasa sunyi selepas ketiadaan suami.

"Jaga anak ini terapi. Kerena mereka serta layanan ibu bapa kanak-kanak berkenaan melayan akak seperti satu keluarga membuatkan kehidupan ibu tunggal seperti akak tidak sukar," katanya.



ZARINA melayan kanak-kanak membaca di taska miliknya.